

Date – 07/05/2025

Time - 7:30 -7:40Hrs

AKASHVANI AIZAWL

REGIONAL NEWS BULLETIN

HEADLINES (MORNING)

- 1. Indona leh inbeihna thleng palha mipuite inpuahchahna dinhmun hriat nan Aizawl District telin ramchhung district 244 ah vawiin hian mock drill neih a ni dawn.
- 2. MBSE Chairman Pu JH Zoremthanga’n kumin pawl 12 exama compartment zirlai 91 ten Admission an tlai lohna turin compartment exam buatsaih thuai an tum a ti.
- 3. India sipaite chuan nizan zanlai khan Pakistan leh Pakistan Occupied Kashmir-a firfiakte awmna hmun kapin Operation Sindoor beihpui an thlak.
- 4. Defence Ministry chuan Operation Sindoor chu rapthlak taka Pahalgama firfiakte chetnaa India mi 25 leh Nepali pakhat thihna chhanletna anih thu a sawi.

<><><>

MOCK DRILL

Indona leh inbeihna thleng palha mipuite inpuahchahna dinhmun hriat nan ramchhung district 244 ah vawiin hian mock drill neih a ni dawn a, Aizawl District ah pawh neih a ni ang.

Aizawl ah chuan chawhma dar 11 ah Tuikhuahtlang AIR Station leh Cicvil Hospital inkarah neih a ni anga, chawhma dar 11 ah DC Office atangin siren tihrik a ni ang.

Tlai dar 6.30 leh 6.35 inkarah Aizawl khawpui power supply tihtawp vek a ni anga, Siren tihrik a ni leh bawk ang.

Sorkar laipui Ministry of Home Affairs hmalakna in defence mock drill hi neih tur a ni a, indo thlawhnaa inbeih thulha inralrinna Air Raid Sirens hman dan turte leh civil mite leh zirlaite tan hmelma te beihna thlen thula mahni inralrin leh inven dan turte enchhin a ni ang. Hei bakah hian indo thlen thulha harsatna thleng thei hrang hrang kawlpheitha chhia avanga buaina leh hmun pawimawh hum dan turte leh insaseng dan turte pawh enchhin a ni dawn bawk a ni. He mock drill hi ramchhunga indo leh harsatna liantham thlen thula mipuite lo inbuatsaih lawk theihna tura duan a ni.

Director General of Fire Services, Civil Defence and Home Gaurd Vivek Srivastava chuan mipuite tan chaimana tur a awm lo tih sawiin volunteer te tha taka lo thawhpui turin a chah a. Akahsvani-in a kawmnaah Pu Srivastava chuan ramdang nena indona thleng palh theiah mipuite inpuahchahna tur a nih thu a sawi.

Union Home Secretary Govind Mohan-a kaihhruaiin ramchhunga state leh UT chief Secretary ten video Conference hmangin Civil Defence Mock Drill neih tur chungchang an sawiho a. He hunah hian Civil Defence leh National Disaster Response Force Director General-te an tel a ni.

<><><>

PHE

Public Health Engineering (PHE) enkawltu Minister Prof. Lalnilawma hovin nimin khan PHE Department hotute, Disaster Management & Rehabilitation Department hotute, Aizawl Municipal Corporation aiawh te leh tlawmngai pawl 3 – Central YMA, Centre for Environment & Social Justice (CE&SJ) leh Save The Riparians hruaitute chuan tunhnaia Tlawng lui nu vak chungchang an sawiho a, Aizawl khawpui mai nilo Mizoram khaw tam tak tan Tlawng lui chu inngahna anih avangin Tlawng dunga lui te leh tui hnar te humhalhna chu Department mal ni lovin High Level Committee ah sawiho nise tia rawt a ni.

PHE Minister chuan Tlawng lui chu Aizawl khawpui tui tlanna ber anih avangin mi zawng zawngin kan veitlan a tul hle a, a humhalhna kawngah Sawrkar Department hrang hrang leh tlawmngai pawl hrang hrangte tan tan ho a mipuite zirtir chu thil tul tak a nih thu a sawi a. Tunhnaia tui awm reng si mahse tui a nut zual avangin pump theih loh a awm zeuh zeuh ta a, hengte hi a chhan hriat a, hma lak ngai te chu sawiho tha tia meeting chu koh anih thu sawiin CYMA leh environment lama thawktu pawl 2 te chu an ngaihdan te sawi turin a sawm a ni.

PHE Department in meeting ah an tarlan danin April thla leh May thla ni 4 ve ve chhungin tui a nut avangin tui an pump tam thei lova. Tui nu turbidity tehna NTU tia sawi a, 5NTU aia sanglo tur chu tui intlak a ngaih a ni a, tui a nut lain turbidity ni 900 – 1400 inkar te ni thin a, hemi vangin tui tih thianghlum chu hna hautak leh khawl ten a tawrh theih avangin tui pump theih zat nasa takin heng hunlaia a tlakhniam thin te an tarlang a ni.

Central YMA, Centre for Environment & Social Justice (CE&SJ) leh Save The Riparians hrulaitute chuan Tlawng lui nut chhan nia an hriatte leh hma lak dan tur zau takin an sawi. AMC lam pawhin leivung paih chungchanga ruahmanna an siamte an sawi lang bawk a. Aizawl khawpui tui tlanna ber anih angin Tlawng lui humhalh chu mut mawh hnar mawha neih a tul thu te uar taka sawilan a ni a, rawtna hrang hrang siam a ni bawk.

Tlawng lui nut chhan chungchanga ah hian Department mal anga hma lak mai a theih lova, Department hrang hrang te nen tanho a hma lak a ngaih thu te, hemi chungchang zau zawka sawiho leh hma lak anih theih nan CM kaihhruaina hnuaiah High Level Committee din nise an ti a ni.

(DIPR)

<><><>

MBSE CHAIRMAN

Mizoram Board of School Education Chairman Pu JH Zoremthanga’n kumin HSSLC exama compartment zirlai 91 ten Admission an tlai lohna turin compartment exam buatsaih thuai an tum thu a sawi.

Nimina Pawl 12 result tihchhuah a nih velah MBSE Chairman JH Zoremthanga chuan a pisaah thuthar thehdarhtute kawmin he thu hi a sawi a, HSSLC result complaint hun chu result chhuah atanga ni 7 a ni a ti a, Exam zawhnate chu LOTS atangin zaa 50-60 siam a ni a, a bak zaa 40-50 chu Application leh HOTS atanga siam a ni tih sawiin, zirna in hma a sawn zel theih nan HOTS question telh tam tura ruahman a ni a ti a, NEP 2020 zulzuiin subject pakhtatah chauh exam that ti duh tan a kum leh nghah ngai lovin Compartmental exam rualin kuminah an exam nghal theih tih a sawi bawk.

<><><>

EDU FAIR

Zirlaite tana zir chhunzawm zelna tur chungchang hrilhfhiahna leh buaipuina, Edu Fest chu nimin khan Aizawl Millenium Centre Rooftop ah buatsaih a ni a, vawiinah chhunzawm a ni ang.

Edu Fest buatsaihtu zinga mi, Lynchpin sales & marketing Manager Gayatri chuan tun tum hi Aizawla Edu Fest an buatsaih tum 23-na a nih thu sawiin, Mizo zirlaiten ramchhung hmun hrang hranga zirna leh zir tur awm an lo hriat zau zawk nan leh an hriatthiam theih nan Edu Fest chu buatsaih a ni a ti a, vawiinah pawl 12 board exam result a chhuah angin, zirlai pass thar te chuan zirna sang zawk belchiang turin sum tam tak senga ram chhung hmun hla tak tak an pan buai ngai lovin, state hrang hranga private university leh institution tha tak tak aiawhte chu Aizawlah ngei an lo kal a, fiah leh chiang taka zirna chungchang an zawhfiah theih avangin zirlaite chu Edu Fest-ah hian kal theuh turin a sawm a ni.

Edu Fest-ah hian state hrang hranga private university leh institution tha tak tak bakah central sorkar atangin Air Force an in phochhuak a, scholarship chungchang te, admission leh free counselling chungchangte, medical, paramedical course, nursing, dental, pharmacy, engineering, computer science, humanities, fashion designing zirna chungchangte a zawhfiah theih a, a zir duh te an kaihruai thei bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

UNION MOS

Ni hnih cham tura Mizorama lo zin, Union Minister of State for Micro, Small and Medium Enterprises and Labour & Employment Pi Shobha Karandlaje-I chuan nimin khan Lengpui Airport-ah a lo thlen hnuin Sihhmui, Sairang leh Ramhluna Prime Minister's Employment Generation Programme (PMEGP) hnuai a hamthatna dawngte a kawm nghal.

Minister of State chuan Sawrkar laipui ruahmanna hnuaia hamthatna dawngtuten an khawsak dinhmun chawikan nana PMEGP hnuaiah eizawwna ngelnghet an nei thei chu lawmawm a tih thu a sawi a. Hamthatna dawngtute hmalakna a zarah eizawwna siam belh a ni chu thawktute fakawm a tih thu a sawi a. Thalaite thiamna tipung a, eizawwna ngelnghet siam belh zel chu PMEGP thil tum pawimawh tak a nih thu sawiin Sawrkar laipui scheme hrang hrang hnuai a hlawhtlinna changtu leh ram hmasawwna thlentu nih tum tlat turin hamthatna dawngtute chu a chah a ni.

Union Minister of State hian thing mistiri, chhang siam, Handloom, Food Processing leh luhmeh thlangtu, hmathatna dawngtute a kawm a ni.

(DIPR)

<><><>

US SPEAKER

United States House of Representatives Speaker Mike Johnson chuan India-in firfiakte a dona kawngah US chuan theihtawpin a tanpui dawn tih a sawi. Nimina Congress-a a thusawiah Spekaer Johnsona chuan India chu US thawhpui pawimawh tak anih thu a sawi a. Ram pahnih inkara insumdawn tawna tur inremna pawh an hlawkpui hle dawn tih sawiin ram pahnihten inbiakna an nei chho zel dawn tih a sawi a ni.

Pu Johnson-a chuan mi 26 thihna Pahalgam firfiaka chetna avanga India in firfiakte a beihna kawngah President Trump-a sawrkar chuan a thawhpui zel dawn tih a sawi a ni.

(Newsonair)

<><><>

PRECISION STRIKE

India sipaite chuan nizan zanlai atang khan Pakistan leh Pakistan Occupied Kashmir-a firfiakte awmna hmun kapin Operation Sindoor beihpui an thlak. Heng an bitum hmunte hi India rama firfiaka chetna tur ruahmanna an siamna leh thu an pekna hmun niin sipaite chuan an sawi a. Ministry of Defence thuchhuah danin hmun pakua bitumin kah a ni a. He beihpui an thlak hi uluk taka ruahman niin ram pahnih inkara boruak tih sosan tumna a ni lo tih a sawi a. Pakistan sipai hmunte kah tel an nih loh thu sawiin fimkhur taka bitum turte hi siam fel an ni tih a sawi bawk a ni. Defence Ministry chuan rapthlak taka Pahalgama firfiakte chetnaa India mi 25 leh Nepali pakhat thihna chhanletna anih thu sawiin he inbeihnaa mawhphurtute chu na taka chhanlet an tum tih a sawi a ni.

(Newsonair)

<><><>